

大清畿輔先哲傳

文學傳七

大清畿輔先哲傳第二十五

天津徐世昌撰

賈炎

從子汝愚

賈炎字午橋號蕉園故城人延泰子年十八補縣學生乾隆三十年以選拔貢成均援例候選布政使經歷其弱冠時侍父京邸日與老師名宿鬪酒吟詩眾客冥心苦索炎援筆揮灑若宿構然書法東坡駢儷之文仿唐四家填詞學秦柳而尤工爲詩著有蕉園詩稿二卷練思運詞無棘句鉤章之苦吳錫麒稱其秀情標舉天骨開張如謝元暉所云好詩圓美流轉如彈丸此實蕉園所自得者炎狀貌魁傑豐下腰腹十圍發聲若洪鐘勇於行義拯人急如恐不及而天性肫摯尤篤友于之誼其兄燦官京師久炎冒雨買小舟往省視中病而卒歸葬之曰鄉人往奠者哭之失聲燦從子汝

愚字柳溪五歲能賦春雪詩弱冠舉於鄉九上春官不第棄帖括業肆力於古從興化任大椿餘姚邵晉涵游友曲阜桂馥宛平史兆蘭偃師武億諸宿儒研究經史旁及金石篆隸生平著述連牀番麗累數千篇文名噪甚出官山西權絳縣渾源州諸篆晚歲居京師步市中突一人前捧足叩頭曰公尙識小人乎小人有二子矣驚詰之迺宰絳縣時其人繼母控所聘同里某姓女不謹求退婚汝愚審其偽叱出之趣命納娶事遂寢二子卽其婦所出也其在渾源有兄弟爭訟者汝愚夜召至廳自持燭燭其面曰爾二人狀貌何相類也問胥吏曰類乎曰類令堂下縱觀之皆曰類復引鏡自照二人感泣罷訟自是友愛倍篤於前其仁德感人類若此汝愚旣工爲詩文然不自愛惜稿成輒棄置卒後其子臻蒐輯殘缺得椿莊文集一卷孟門詩草一卷梓之行世初史兆蘭得秦皇

墓磚製爲硯汝愚喜奇書古聞而走索之兆蘭卽出贈附以長歌
中有柳溪卓爾當壯年篆隸突過熹平前文辭江海迴洪瀾之句
汝愚工漢隸又喜爲繆篆不失古法而古文辭尤爲時所推蓋紀
其實也

辛大成

溫如玉

如玉子序賦

宋赫

監長年

辛大成字展亭號蘿村又號達夫盧龍人乾隆三十一年進士授
四川昆甯知縣昆甯居邊徼彫剋難治大成威惠兼施內絕苞苴
外興學校租稅之不便民者悉捐除之民呼爲辛太清患土苗不
靖每力請於大府籌豫防之策後果變勞師征伐其先識若此在
官八年報最將擢會理州適丁母憂大府知其貧資以千金始獲
歸里平生所歷山水皆有題詠過巫峽瞿塘灩澦堆嘉陵江諸作
蒼涼悲壯頗似杜陵晚年益肆力典籍帷鐙呬唔若寒素然與撫

傳二十五
二
寧溫如玉宋赫爲詩友性情恬淡常策蹇游山谷雖販夫牧豎皆知爲辛先生

溫如玉字尹亨號廉圃天性孝友髫齡就傳日誦千餘言乾隆十年成進士由翰林院檢討授山西道監察御史十八年充廣西正主考官升禮科給事中轉刑科兩視學湖南北二十九年巡視山東漕務旋以病歸歷官清要廉潔自持著有靜淵齋詩存醇粹恬雅不事叫囂得風人遺旨子序斌字石坡食貧讀書力紹父學爲詩不矜格調而機趣自然屢試不售橐筆遠游足跡半天下年七十始歸里家徒四壁立授徒自給梅成棟官永平教諭與序斌交最懽朝夕辨論經史以及儒理禪宗歷算輿圖諸書莫不洞悉精奧成棟歎爲有本之學著有六疋心聲詩集

宋赫字東野乾隆二十三年舉人生平一介不妄取言行方正與

時多齟齬家貧授徒餬口境愈窮詩愈工卒抑鬱客死著有東野詩草長洲陶樸輯畿輔詩傳稱其樸老蒼秀爲永平獨步其時有樂亭瞽者嘗長年亦以詩名

長年字芝亭四歲患痘失明及長志趣高遠從諸兄授讀旣成誦皆貫通大義因舉漢魏六朝三唐詩一一耳熟之默識窅窅作有韻之文輒得新語所著芝亭詩草一卷其蹊徑不專主一家靈府澄澈靄然孝弟仁者之言論者以宋時楊希閔明季唐汝詢比之二子皆瞽而工詩者也其早秋病起偶述云殘暑晝猶長早涼秋尙嫩露荷散清香風竹含疏韻幽閒竟日卧衰病無人問薄暮宅門前槐花深一寸春日偶成云華門春草色終日無俗客倦眠長日曛兀坐每更末弄笛花鳥知題詩風月和偶步長松林無朋惟引鶴情思澹逸讀其詩可以見其人同里楊開基序其集謂其學

足以自成品足以風世蓋不僅以詩傳也

紀曾藻

紀曾藻字文溪號小癡文安人少駿偉九歲日誦萬言十五通十二經乾隆三十五年舉人出爲縣令歷任山西陽城太平長子諸縣有政聲丁母憂服闋授廣西永福知縣時安南軍興羽書絡繹供頓不一擾民調貴縣縣界廣東高廉海匪嘯聚廖三進者尤強橫官不能制曾藻至躬率民壯入山禽三進及其黨十餘人以次抵法縣境獲安擢思恩府理苗同知以積勞卒年四十六曾藻學富才贍下筆輒千言立就詩思深湛氣骨尤俊偉黃世發序其集謂爲才人之作非僅詩人之作也有小癡遺稿一卷

李維寅

子雲章

龍鐸

李維寅字春旭一字欽伯大興人父蔚字青岑乾隆二十一年進

士官廣東潮州府知府有嵐秋山房賸藁維寅少篤學年十九舉
乾隆三十九年順天鄉試四十九年會試以國子監學錄用授廣
西義寧知縣義寧地瘠民惰維寅勸墾種興學校鄰邑有僧惑眾
作亂微服入山縛之散其眾調宣化適安南用兵徵輸饋餉車舟
供帳之役什倍他邑維寅措置裕如而民不擾總督福康安廉其
賢奏擢左州知州嘉慶二年西隆州苗變時方署養利得替乃馳
赴舊州募鄉勇禦賊總督吉慶率官兵繼至維寅上書言軍事略
曰苗不足憂當安民民遭焚掠無所容且從賊而賊勢成矣古稱
徵兵滿萬不如招募數千蓋以募爲振則民心安民心安則賊氣
奪而急私讐悉敵情尤無過於土著之民者苗性本嗜殺承平日
久驕而思逞非先剿後撫使力窮心餒則翻覆尙未可知耳博引
宋明征苗前事辨論數千言繪地圖山川夷險攻守形勢了然吉

慶大喜檄維寅隨營理糧餉嘗督鄉勇開隆愛山苗以木石拒山徑維寅奪其七隘礮碎馬前蓋不爲動山澗湍急無舟梁眾相顧逡巡維寅縱馬涉中流眾皆奮呼以從遇賊戰繫其酋歸紅水江者黔粵之限苗恃以爲險者也造巨艦十餘來犯吉慶患之維寅夜至江察隔岸鐙火滅沒使人泅而過盡斷其纜沿流鼓噪守船賊暗中突觸自相殺卽得其船渡江解册亨州之圍事聞升授太平府龍州同知官兵凱旋大府檄維寅與左江總兵穆克登布留後時近江十三寨觀望不卽附維寅破高寨之匪招撫餘苗安其居民歲盡戴功明年將引見以事不果行歷署永寧全州河池諸州染瘴卒年五十有一維寅威儀倣儻居官二十年治行卓然不名一錢而周恤急難獎拔後進汲汲如恐或後性耽吟詠精藍巖洞留題殆徧德泰稱其詩寄託深遠皆有關於風教湯藩則謂高

明伉爽激昂悲壯之氣具體韓蘇雖生平仕宦功名未竟其志而詩則必傳無疑也有廉餘詩集二卷行世子雲章字子文號壽君嘉慶二十三年舉人官撫寧縣教諭博學工詩所作戛戛獨造意在力追古人古體馳驟豪宕光怪陸離律句整練高華肩隨七子舉唐季五代纖佻薄弱之習一洗空之詢詩壇射雕手也著有咫聞齋集其時同縣有龍鐸者

龍鐸字振升號雨樵乾隆二十四年舉人生而穎異十二歲時杭州朱某命詠瓜子皮應聲而就有莫道東陵無託意此中黑白儘分明之句朱驚曰此子將來必以詩名後宰江蘇吳縣袁枚每掃墓杭州必過其署鴈鵠炮躡觥籌交錯聯吟鬪勝豪氣飛騰枚稱爲風塵中奇士其詩集散佚無傳

李廷敬

兄廷揚

李廷敬字景叔號寧圃一號昧莊滄州人生有夙慧淹通羣籍乾隆三十八年應天津召試欽賜舉人四十年乙未成進士授翰林院庶吉士旋改戶部主事出知常州歷江蘇江寧蘇州知府擢蘇松太道所至興利除害慎獄省刑政績卓然初廷敬由翰林改部曹乞假省其兄廷揚於粵東道署廷揚友愛獨至寫風雨對牀圖並畫其像於座昕夕聯吟爲樂及同宦吳中一僕一舟數數往來於山林泉石之間人以比之眉山兄弟廷敬性豁達好客能容物題襟投轄從者如雲時與吳錫麒袁枚王文治祝德麟洪亮吉陳廷慶趙懷玉何琪林鎬陸繼輅輩以詩文相雄長商榷古今經史疑義恆達旦不寐晚年益嗜書丹鉛不去手所輯二十二史紀傳節要三通節要唐詩百家選列朝詞選平遠山房詩話又自訂詩古文詞爲平遠山房集其所填南北曲輒付小伶歌之尤好古精

鑒別嘗得銅琴一張上鐫薛道衡三字又輯歷朝名人書刻平遠堂帖士林爭購寶之廷揚字巖野號隨軒又號退廬乾隆二十五年進士由員外郎視學雲南期滿轉郎中授廣東高廉道調惠潮道多善政去之日拒輪遮馬者老穉填衢凡三百里不絕四十八年擢江蘇按察使調廣東以海豐案罪名錯誤鐫級遂引疾歸著有遂初堂詩文集皆罷官後編定者也卒年七十五

張太復

潘文本

李昌舒

張太復原名景運字靜旃號春岳一號秋坪南皮人博學能文尤長於詩乾隆丙申上東巡獻賦津門詔在翰林院四庫書謄錄四十二年選拔貢生授浙江太平知縣以洋案謫戍破產得贖改遷安縣教諭性好遊營南浮江淮西登太行東走歷下再至錢塘吳門懷偉抱負奇氣激昂振奮一洩之於詩大江南北詩人如陽

湖洪亮吉遂寧張問陶皆慕與交年七十餘馳騎射鵠如少年書
舍一區琴書几榻瀟灑夷曠舍外茂樹連雲皆數百年物所謂因
樹山房者也其詩跌宕淋漓神味淵永獨來獨往有不可一世之
槩閒作小畫秀逸超眾書法出入晉唐論者有鄭虔三絕之目自
作生傳營壙題碣曰詩人張太復之墓著有因樹山房詩鈔二卷
西齋小稿四卷令文集四卷餘集一卷北邙集二卷後集一卷岫
雲集一卷後集一卷南浮集一卷續集一卷又北上集晉遊集歷
下遊集賜錦集瀛館校書集益津集金臺集橫湖集北歸集居京
集知非集沾上集鹿城遊集觀瀾集京邸集吟風集各一卷又有
秋坪新語續新語田盤紀遊諸書

潘文本字立堂號石湖遷安人與同里李昌舒以詩文相砥勵交
甚篤嘉慶十一年南皮張太復訓導遷安張故負詩名海內意少

許可見文本所作迺大奇之稱爲詩友以家藏古墨代縞紵焉文
本放情肆志與俗多乖忤著有石湖詩草其自序云願耕於西山
暇則以硯田自娛故號石農將置別墅於西山石湖之側故亦號
石湖子或稱竹伯者竹在本上猶云策伯也世人皆巧我獨拙期
不失其素耳又欲自號鈍散漢鈍則以鋒利讓人散則不受束縛
漢者欲終不失爲丈夫也故所作多悲壯語年五十竟以諸生終
李昌舒字坦齋號伯度父綸字春卿乾隆五十一年舉人著有寶
翠軒遺稿昌舒學問淵雅蚤歲卽以文章名嘉慶二十三年舉鄉
試時年四十餘矣道光六年以大挑一等官甘肅合水知縣縣磽
瘠風俗椎鄙昌舒以誠意感孚民欠租累數千爲捐俸代償丁父
憂歸服闋請終養事母母卒復補環縣值大旱禱雨於城隍神不
應爲文以責取鎖械與神竝繫暴烈日中民環跪泣請是夜雨歲

大豐始環米斛錢三千賤至五百又慮其傷農買穀貯倉廩明年夏水災昌舒日行泥淖中障隄補決四竟得無恙時議清隱田官吏承風旨以多報升科爲功昌舒第報五頃曰盡矣上官責促之終不應民有惑於繼妻而迫其孀婦改適成訟者牒至庭剴諭之民大感服婦節始全環人少文學教士子尤有法如課其子弟後以勞疾卒著有挂雲山房詩草西行草西行續草等集生平服膺袁枚答沈潛論詩二書故所造近此晚年格韻益高其書畫尤爲當世珍貴

何詒霈

父夢蓮

何詒霈字東垣號緯齋正定人父夢蓮字淨亭號周溪乾隆四十二年拔貢生授刑部七品小京官越二年領鄉薦洊歷主事員外郎中嘉慶元年楚苗之亂奉旨馳驛赴軍營權衡永彬桂道旋入

都補戶部郎中轉山東道監察御史上疏條陳時政論長蘆鹽加價不爲商利祇以病民疏入得減去每斤錢一文尋出知陝西榆林府護延榆綏道坐事鐫級歸薄田數十畝僅供饘粥恬如也夢蓮幼穎異七歲能文善爲詩歌其雞鳴居庸及捕蝗苦雨之作接響少陵鐵堂赤谷新安石壕諸篇倚聽一編則又借問關戎馬以發其纏綵忠愛之忱蓋兼學人詩人而有之者卒年六十有五所著有式古堂詩集四卷詒需嘉慶十年進士恬淡好學究心經制之書嘗讀儀禮朝覲等篇及周官大小行人職輒掩卷長思以爲古諸侯以彼區區之國山川林麓三去其一采邑萊田二去其一再加溝畛洫涂澮道之浮廢則入公者無幾耳往來饋贈禾米數十車醯醢數十甕乘禽一日數十雙雖曰優渥不綦頓乎此無他故版圖廣狹但以并計萊田在外物產富矣寓兵於農軍餉裁矣

戎軍一乘役車三之驛費節矣下土以上各有采地歲所獲精視
年上下官俸省矣既有分土卽有分民銜命行役各徵其私供億
輕矣鄉遂公役粟備王食此外家箭都鄙皆有歲納而關市山澤
幣餘亦各有稅九賦歛之九式節之歲之所入十倍所出人主得
以其餘聚迎來送往通商惠工養老孤卹羸阨涵育士儒崇獎風
化故井田者萬事之根本也制莫詳於三代法尤備於成周於是
撰爲成周徹法演一書假設賓主問答以盡其詞并訂爲圖譜凡
二十四章其爲說以周禮爲主而援據古訓以定其制如本古文
尙書濬々々距々而得制產計畝之法本說文田從口象四圍畝
々田十四方而得畫井授田之法是也又參攷羣籍以盡其義
如造土之序命民之制則本之尙書大傳封爵之等附庸之名則
本之白虎通義革車役車戎馬之數則本之司馬法是也又有訂